




VÖG VOLAPÜKA.

,Daniil Morozov': redakan
ä vicifal,
,shido2308@yahoo.com',
,Ekaterinburg', ,Rossija' / Rusän.

Jäfidot soga bevünetik Volapükka.

YELOD 34^{id}. NÜM: 6. 2024 YUNUL. PADS: 45 jü 52.

RALPH MIDGLEY (1929–2024).



Nun lügik epubon, das hiel Ralph Midgley tü 1929, novul, 25 pemotöl edeadom tü 2024, mayul, 23. Äbinom redakan balid gaseda obsik (jü novul yela: 2014), guvan Volapükane (de 2006 jü 2015), liman kadäma nulik Vpa (de 2007 jü 2015), stimakadämal soga bevünetik Vpa (sis dekul yela: 2015, kü äklemom calis valik oka pö Vpamuf demü bälidot oka e fibikam tuvemik logama-faga). Älautom penädis sevä-

dik mödik dö Vp pro Linglänapükans: tidodemis, vörabukis zänodagretik (om it epenom bosi dö atos in yeged okik, kel pebükon su pads fovi); id ätradutom lautotik valasotik ini Vp. Äprimom ad vestigön sta-böfiko gramati Vpa in yegeds sökoda: ,Volapük in Use'. Älanälükom mödikanis ad lärnön e gebön Vpi, ün timäd obsik ävedom balidan, kel ägebom aldelo Vpi. I mastiko äpoedom Vpo.

Ko om menef eperon bevüpükavani mu gretiki. Eplöpom ad dönulifükön Vpamufi, edunom saidikosi ad dönulifükön püki: ,Neo' fa ,Al-fandari'. El Ralph oblebom laidio in mem Vpanas dasaman tefü zil pro Volapük. Takädomös in püd!

VOLAPÜK SIS YEL: 1960.

Fa ,Ralph Midgley'.

1. TIMÄD NULIK VOLAPÜKA.

Finü yel: 1962 < gased calöfik Volapükä: „Zänagased pro Volapü= kanef” < no plu pääbükön. Pos yels plu teldegluls gased at, kel balido pibükön fa ,Arie de Jong’ e kevobans dis tiäd: „Volapükagased pro Nedänapükans”, äbinon deadik. No sevoy kuratiko, Volapükäflens liomödotik ädabinons da vol ün tim et. Ba kildegs, ba kiltums — tio valikans äseilons. Dü degyel at Volapük äslipikon ai dibätikumo; äjinos äsif ödunon-la natemi lätkün.

2. CIFAL FIEDIK E NÜKÖMÖLAN.

Dü yunüp oba äbinob sperantan zilik. Ästudob jenavi püka, ed äkolkömob balidnaedo dubo Volapüki. Ko nited gretik ästudob püki fa el de Jong pirevidöli, ed äpenom cifale, kela ladeti seimo ituvob ad seivön omi. Ägespikom sunädo penedi obik tü d. degtelid dekula ela 1975 penätü ok. Ekö! vödem ot:

O söl digik: ,Midgley,’

Päsüpädob e vemo pälabükob <ad> getön penedi olik dätü d. 29^{id} novula, e spidob <ad> gespikön ole.

Kiopo älärnol-li Volapüki? Löliko in bukem-li Britänik? Bukis e pübotis kinikis labol-li, e kinikis etuvol-li votöpo? (Vipoböv <ad> lisedükön valikis, kels seimüpo ädabinons). Ol gebol püki rigik ela ,Schleyer,’ ab ob penob me fom püliko perevidöl fa dokan: ,Arie de Jong’. If vипol remön bukis (ässä gramatis e vödabukis), penolös söle: ,Reinhardt Haupenthal’ [egivom obe ladeti oma tü tim et]. Om labom stoki gretik ledino in dialeg at, e labom bukili nitedik: „Jeno= tem valemapükä: Volapük” fa söl: ,Schmidt’: ciful attimik mufa.

If vilol penön medü Volapük, penolös söle: ,Abelardo Sousa’ [ladet]. Om sevom legudiko fomi rigik e penom ai lemödiko. Ba ya egetol penedi de söl: ,Donald Gasper’ [ladet].

Semikna obs kolkömobs in zif: ,London’ ko flen mufa: ,Ido’: ,Ro= bert Carnaghan’, e mufa: ,Neo’: ,Douglas Blacklock’. If vипol spikön

ko obs, pöt sököl obinon tü d. 7^{id} yanula za düpalaf pos degtel dü poszedel. Kanol telefonön obi dü vobadüp medü [nüms telefonik].

Pükis valemic kinik ol sevol-li? Ob ya spodob ko lautans e slopans pükas ömik. Ab patiko plidob püki at fasilik, nitedik, yönädik ed igo jöniiki. Vipoböv <ad> dönustabükön mufi gretik Volapükka in vol. Kisi ol vipol-li ad dunön?

Begespikolös, begö! suniko obi e penolös suniko lü ladets ya pemäniötöls.

Ko glids flenöfik e benovips gudikün pro kritidazäl e nulayel okömöls.

B. R. Bishop.

So kevob obas günü Volapük äprimon. Ekö! cifal lanälik, kel ne-foro iperom speli dü yels. Stadom in ked nenropik, kel päprimükön bü yels mödik fa ‚Schleyer’ it. Id äseivob pösodis votik, kels äviloms spoden medü Volapük. Balan otanas äbinom hiel Abelardo Sousa se ‚Florianopolis’ (Brasilän), ko kelan äspodob suvo. Lefat omik äbinom pionir Volapükka us. Äbinom vemo tälenik. Zuo äbinom musigan, kel änoatädom hümi lobü Volapük.

3. NEODOT BALID DRANIKÜN.

Poso äspodob laiduliko ko cifal. Do ya ilautom tidodemi me sperant, ün degyel 1970^{id} äprimob ad lautön tidodemis Volapükik e Linglänapükikis, bi ün tim et tidodems valemo äbinons pro Volapük rigik ela Schleyer. Seko neod gretik ädabinon ad lautön tidodemi gudik e brefiki pro Volapükflens Linglänik. Ya ädabinons tidodems legudik Deutänapükik e Nedänapükik. Tidodem balid oba tiädü „Volapük vifik” pästudon fa mödikans medü püks mäl. Id älautob „Naböfaninädi Volapükka” (me Lingläna e Fransänapük) gebabiki pro säkans, kels ävilons te xamön binodi püka sekü nuläl. Ats äbinons tidodems balid, ab latikumo emekob tidodemis votik tel, kels äbinons nitedikums e pötöfikums ad studans zilik.

4. NEODOT TELID DRANIKÜN.

Sis yel: 1962 < gased Volapükik nonik äabinon. Ab muf bevünetik neodon gasedi ad balön Volapükaflenis valöpao e nünön ones nulodis tefik. Tü fin yela: 1979 < äsludob ad primükön gasedi, kel pa=nemon anu „Vög Volapükä”.

Ye tiäd balid no äbinon „Vög Volapükä”, ab „Pened komunik Volapükaflenes valöpo”. Dü yel te bal tiäd gasedila äbinon „Pened komunik”. Tü del semik balan reidanas epenom obe ad nunön: „Tiäd nejönik kion! No kanol-li tuvön nemi gudikum pro gasedil obas?”

Seco ün yel: 1991 evotükob nemi. Nu äbinon „Flenef bevünetik Volapükä” stimü klub necalöfik pro Volapükafleñs, keli ettimo ifünob. Ab pos yels degkil äsäkob obe: „Binon-li nem pötöfik?” Tü tim et äpreparob tidodemä Volapükä. Bal lärnodas tidodemä at äbinon dö jipul, kel ilärnof Volapükä, ab äviloñ spodön Volapükä ko ek. Seco epotoñ penedi lü gased pefomälöl tiädü „Vög Volapükä.” „Nem gu=dik kion!” ätikob, e sis yel: 2004 nem gasedila obas binon „Vög Volapükä.” Dü dabin gaseda ye nem ota peceinon kilna. Gased at pubon balna a mul.

Sekü atos neodots gretikün tel muña pejenöfükons, sevabo tidodem pro primölans, äsi gased calöfik ko yegeds valasotik.

5. TUMYELAZÄL VOLAPÜKA.

Yubid tumyelik Volapükä äjenon dü yel 1979. Äbinon pöt vemo gönik ad propagidön püki. Els ,BBC’ (Netatelevid Britänik) ed ,ITV’ (Büsodatelevid Linglänik) ävilons mekon broadotis dö Volapük e dö jenotem ota.

Cifal ed ob äkompenoms pö ats. Igo anu kanoy nog juitön filmoti in bevüresod valöpo (pläämu Greta-Britän, kö peproibon). Ün tim at Volapük päpropagidon da vol lölik medü netagasesds veütik, radion e televid. Tim gretik kion!

E cifal ed ob ädasevoms fruti veütik yubidas somik. Cifal it äjäfädom me jenots at. Ekö! küpedots oma: „E nu pötos ad tikädön zälis veütik votik tel: motedazäl (tü d. 18^{id} yulula) e deadamayelam (tü d. 16^{id} gustula) datuvana Volapükä. No binos tu gölik ad blü=

mükön obis in tef at.” Cifal ai ägebom zälis somik ad propagidön Volapüki.

6. TIMÄD NÜNÖMAS.

Penamacin äbinon „flen” gretikün obik tefü Volapük. Jü yel: 1995 ägebob oni ad redakön gasedi Volapüka, e ad spodön ko lebonedans ota. Ab ün yel: 1995, son oba fino esüadükom obi ad gebön nünömi — jenöfo ägivom obe nünömi oka, bi ävilom remön nuliki.

Büikumo ninäd pebüköl gaseda äbinon ot, ab yufü nünöm äkan nob dunön milagis! Gasedanüms bü 1995 ed uts pos yel at binons go distiks. E süikam bevüresoda id ävedükon voli nulik rivoviki pro Volapük. Pötis mödikum at ägebobs ad propagidön püki da vol lölik.

Fino kadäm bevünetik Volapüka jäfidon dönü, buks jönik pubons dönü pos nejäfed lunüpik.

Volapük lifon dönü! Lifonös Volapük dü yels lemödik fütüro!

2013.

SÄKASPIKOT ELA RALPH KO CALONUNODAN ÜN 2001.

El Ralph Midgley äsevom pükis mödik, sevabo e natikis (Deutänapüki, Velsänapüki, ...), e mekavikis (speranti, elis Ido, Interlingua, Neo, ...). Atos ämögükon ome ad bespikön Volapüki ko jigasediman: „Katarzyna Tempczyk”. Säkaspikot tefik penotükön ün setul yela: 2001 < medü gased sperantokluba di ‚Warszawa’: ‚Varsovia Vento’. Sotüli Volapükik spikota et kanoy reidön in nüms: 9, 10 < ela „Sirküläpenäd” pro yel: 2001; sotül ma pük: ‚Ido’ < ko tiäd: ‚Interviuvo kunsioro Ralph Midgley ek La Flenef Bevünetik Volapüka’ pepübon in nüm: 324 < timapenäda: ‚Progreso’ (<https://web.archive.org/web/20210803021854/http://www.ulি-ido.ovh/index.php?page=progreso>). Us kanoy seivön, das ettimo Volapükans te degs ädabinons in vol; num at sis tim et pekilon — mubalido danädü jäfed ela Ralph. I nitados, das in nüm ot jäfidota balatama di ‚Ido’ kanoy tuvön penedi papale: ‚Leo’ XIII^{id} tefü ‚Schleyer’. ■

YÜMAMALÜL PÜLIK.

Fa ,Ralph Midgley', 2011.

Yel moteda obsik, äsi deadama
 Pateilon fa stripül smalik e blägik.
 Elifobs-li lifi gudäla, no blama;
 Emoon-li lif at fluköfik, u sägik?
 Lif obas me gudäl, bo me bad fulon;
 Fa yumamalül at papladulon.

Ven äbinobs yuniks, lomo lä pals,
 Lölo sekidiks, e lölo sefiks;
 Nedanöfa dabinons-li ya mals,
 Dub zunül äsi mäpüd jeikiks?
 Lif obas me gudäl, bo me bad fulon;
 Fa yumamalül at papladulon.

Juladels pasetik, ab in mem nog liföls;
 Ästümobs-li flenis, sufälobs retanis?
 Ätirenobs-li onis dredo ga ciföls,
 Ud ästimoy-li obis äs gudälanis?
 Lif obas me gudäl, bo me bad fulon;
 Fa yumamalül at papladulon.

Älobedobs-li cifi obas in voböp?
 E kevobanes äbinobs-li fiediks?
 U ba ällibobs-li su lönik tikädöp,
 Kel äkodon geamis, vödis neplitiks?
 Lif obas me gudäl, bo me bad fulon;
 Fa yumamalül at papladulon.

Nu, finü yels obsik, vob obas pedunon.
 Lif obas, ebinon-li plöpikos, u no?
 Yümamalül pülik, mükik nu ejonon
 Spadi tima, ün kel äglibobs ge e mo.
 Lif obas me gudäl, bo me bad äfulon,
 Ab fa yumamalül at ya pepladulon.

CIFAL, KEL NO VILOM BITÖN ÄS PAPAL.

Filmot nulik Volapükki teföl penotükon bevüresodo. Atna su skrin kanoj logön eli ‚Hermann Philipps’: ciful. Ekö! pads bevüresodik tefik:

,<https://www.zeit.de/video/2024-05/konstruierte-sprachen-film-serie-linguistik>
,<https://youtu.be/yPaGbFCGNCg?si=3hYNvriF0Tkg7r2q>’

Nün veitökum. Nunodan: ‚Thilo Adam’, gased bevüresodik: ‚Zeit Online’. Spikans: ‚Hermann Philipps’, ‚Jessie Peterson’, ‚David J. Peterson’; vög jikonana: ‚Poliana Baumgarten’.

In tiäd filmota at pemänioton papal, sevabo: ‚Von DUNE und Game of Thrones lernen – wie man Sprachen erfindet’, u ‚Beim Papst der vermutlich nutzlosesten Sprache der Welt’.

Verätos, das datuval semikna ästeifülon ad kondötön äs kultan löpikün tefü „komotanef” Volapükik: älesagom, das ädalom-la votükön Volapükki nendemü ced degmilatas pükigebanas ipuböl, no äzepom daväli presidanas Volapükaklubas, igo äprimom ad lautön lisedi bukas peproiböl tefü Volapük. Bit somik cifulik ye enepubon ya sis lunüp. Igo ciful telid: ‚Albert Sleumer’ < äbespikom nomis Volapükka as leigagredätan ko mastans votik ettimik efe ko els ‚Arie de Jong’ e ‚Jakob Sprenger’; leno äbüadom bosi tefü pükasit. Kludo binos bisarik, das ciful ma daced mödikünanas jünu sümon-la ad papal nämädik zänodatimädik. Bo ‚Schleyer’: ciful balid it < äbinom kodan atosa, bi äkanom mänioton papi, äsä pö plän sököl yela: 1889 < dö diplom senätana Vpa: „*Senätans* aibinoms *konsälef* [konsälalef] nabikum [vemo nilöfik] ä lepesevik [konfidovik] datuvela [datuvana] ä cifula; binoms sümikos, kelos binoms *konsälals* dileka [dilekanefa] sembal [ömik], u bisiedala [presidala], u plina, u papa [papala]..., o. b. [sevabo] dünals [ministerrans], kadinals [kardinals]... Datuvel [datuvan] ed alik ciful *välom* [cäldom] senätanis oke [pro ok] segun [ma] ced oka, ed alik ciful mutom *pavälön* [padavälön] se ä fa senätans. Ots [otans] getoms fa [de] datuvel [datuvan] ä ciful *dipedis* [diplomis] *geilikün* vpa. [Vpa], if binoms peväöl [pedavälöls], pedanemöl [pecälodöls] ä pebluföl [pebluföls] fa datuvel [datuvan] ä ciful.” Spelobsös, das danädü ked cifulas no löniälikas seimüpo subsat: ciful < obinon siämaröletik no tefü papal fatüitik, ab tefü jäfüdisevan ä vestigan mükik. ■

NUNS DÖ BUKS.

(1) FÖVOTS AD VÖDABUK GRETIK.

Finü prilul cifal: ‚Hermann Philipp’s‘ < enotükum bevüresodo sotüli nulik fövotas ela ‚Arie de Jong‘ ad vödabuk gretik fa otan. Lebuk at i ni=nädon nulavödis komandabik mödik se vödems dasamik u pezepolis fa kadäm. Läxcifal: ‚Brian R. Bishop‘ e vicifal: ‚Daniil Morozov‘ eyufoms ad läfulükön vödalisedi gretik at, kel ya binon sam süperik vestiga kälöfi=kün püka obsik. Kanoy dagetön ati pö pad sököl:

,<https://www.facebook.com/groups/volapukalised/permalink/10160722499905129/>

Utans, kels no dalons gebön bevüresodi lölik, bo kanons logön padi at: ,https://vk.com/wall-69180623_848‘.

(2) PENÄDS VÖNÄDIK.

Anu danädü bukemöps dabinik num penädas yönädič ai gretikumon bevüresodo. Jenäd at i tefon Volapükaliterati. Nemögosöv ad numädon is fonätič nitedik valik, ab nemü redak vilob küpälükön reidanis ad pad sököl labü gasedem:

,<https://volapuk.temerov.org/Volapükkanef/vol/Volapükagaseds.php#rigik>‘

Pro Volapükavan alik binons mu nitediks gaseds sököl: „Volapükab=bled“ (redakan: ‚Schleyer‘ it), „Cogabled“ (redakan: ‚Schnepper‘ in ‚München‘), ‚Le Volapük‘ (gased Fransänik), „Volapükagased. Mulape=näd nebolitik“ (ko redak in ‚Wien‘), ‚Rund um die Welt‘ („Zü vol lölik“, redakan: ‚S. Lederer‘).

Pö resodatoped pemäniotöl ot i kanoy tuvön bukis susnumik as nüneds: ‚PDF‘ u ‚djvu‘. Pübots Volapükik bü yel: 1887 < bevü votikos onitedons jäfüdisevani tefü jenotem penama, bi labons tonatis patik di ‚Schleyer‘ pla vokätatonats. Seimans äplöpons ad bükön onis nen tonatots patik. Ekö! sams anik se buks fa ‚Fieweger‘, pö kels nig äjinon pagebön:

À à	Ã ã	Bens; no dñnan
Ô ô	Õ õ	Ð, o srl Yust!]
Û û	Ӯ ӻ	âtikob-la, abinob-la bo srl